

Tasiilap eqqaani piniarnermik nakkutilliisoqartitsisoqalernissaa suliareqqullugu Naalakkersuisut peqquneqarnissaanik Inatsisartut aalajangiiffigisassaatur siunnersuut.

(Siumup Inatsisartunut ilaasortaaitai)

Akissuteqaat

(Aalisarnermut, Piniarnermut Nunalerinermullu Naalakkersuisoq)

Siullermeerneqarnera

Tasiilap eqqaani piniarnermik nakkutilliisoqartitsisoqalernissaa suliareqqullugu Naalakkersuisut peqquneqarnissaanik Inatsisartut aalajangiiffigisassaatur siunnersuuteqartut, Siumup Inatsisartuni ilaasortaaitai, Naalakkersuisut qujassuteqarfagai.

Tamaannga oqaaseqassaanga, Kalaallit Nunaanni maannakkut arfinilinnik piniarnermut nakkutilliisoqarmat, Tasiilallu eqqaani nakkutilliisoqarneq Nuummi piniarnermut nakkutilliisumit isumagineqartarluni. Unioqqutitsisoqarsinnaanera aallaavigalugu naliliisoqarpat Tasiilami nakkutilliinermik ingerlatsisoqassasoq, taava Nuummi piniarnermik nakkutilliisoq Tasiilamut angalassaaq.

Unioqqutitsisoqarsinnaaneranik naliliineq tunngavigalugu nakkutilliineq ingerlanneqartarmat aamma Kalaallit Nunaanni Aalisarsinnaanermut Akuersissutinik Nakkutilliisoqarfiup ingerlatsinermut missingersuutai eqqarsaatigalugit suliassanik tulleriiarisooqartarmat, taamaattumik Tasiilap eqqaani ukiuni kingullerni pingasuni nakkutilliinermik ingerlatsisoqanngilaq. Piniakkanik pisassiissutigineqartunik unioqqutitsisoqartarpoq, piniakkat eqqissisimatitat aamma akuersissuteqarani piniarnerit, pisanik nalunaaruteqanngitsoornerit kiisalu piniakkat pisassiissutigineqartut piniarneqarnissaasa avataatigut piniarnerit ilanngullugit. Suliassat politiinut ingerlateqqitassanngortinneqarput.

Naalakkersuisut ilisimavaat, tamaani qilalukkat qernertat nannullu ukkatarineqangaatsiartut taakkunungalugu pisassiissutit ukiuni kingullerni tallimani sipporneqartartut. Arferit anginerit arlallit tamaaniittarput, aamma arferit anginerit eqqissisimatitat amerlasuut pissatarineqartartut nalunaarutigineqartarpoq. Kisianni Tasiilap eqqaani piniagassat killeqarneri pissutigalugu, tamaani tuttunik, umimmannik qilalukkanillu qaqortanik takussaasoqarneq ajorami, Tasiilap eqqaani piniarnermik nakkutilliisumik ataavartumik inissiinissaaq naleqqutinngitsutut naliliiffigineqarpoq.

Tassunga ilanngullugu soorlu siunnersuuteqartunit oqaatigineqartoq aallartisarnermi aningaasartuutit 2 mio. koruunit miss. akeqartussaq kingornalu Tasiilami piniarnermik nakkutilliisumik ataavartumik inissiisoqassappat ukiumut ingerlatsinermi aningaassartuutit 1. mio. koruunit missaanniissasut. Kalaallit Nunaanni aningaasaqarnikkut inissisimaneq pissutigalugu Kalaallit Nunaanni Aalisarsinnaanermut Akuersissutinik Nakkutilliisoqarfik peqquneqareerpoq sipaarniuteqassasoq, taamaattumillu Tasiilami piniarnermik nakkutilliisumik pilersitsisoqarnissaanut aningaasanik immikkoortitsinissaaq periarfissaqanngitsoq, Kalaallit Nunaanni Aalisarsinnaanermut Akuersissutinik Nakkutilliisoqarfimmi suliassanut pioreersunut annertuumik kingunerlussinnaammat.

Naggataatigut oqaatigisariaqarpoq piniarnermik angallatinik nakkutilliinissamut politiit Arktisk Kommandolu aamma pisinnaatinneqarmata. Kalaallit Nunaanni Aalisarsinnaanermut Akuersissutinik Nakkutilliisoqarfik Arktisk Kommandolu suleqatigiinnerat pitsaasumik ingerlavoq.

Tamanna tunngavigalugu Naalakkersuisut innersuussutigaat aalajangiiffigisassatut siunnersuut itigartitsissutigineqassasoq.

Taamatut oqaaseqarlunga oqallinnissaq Inatsisartunut tunniuppara.